

Mr. v. Hullen

Ein Flugblatt aus

(a. L.) 1520.

CL  
2656a

18  
Rm

Wackernagel: Proben d. dt. Prosa, 1844.

Sp. 211.. 226


1. Böcking: Index bibl. ff. 4322, S. 67.

2. id., T.: Congruentiones [deutsch]

Schubh 1859 I. S. 405-419



17  
R  
s.



# Ein Clagschriſt des Hochberühm-

ten vnd Vernueſtē herren Ulrichs vō Hutten

getrōneten Poeten vñ Orator an alle ſtend

Deütſcher nation/Wie vnformlicher

weiſe vñ gātz geſchwind/vnerſücht

oder erfordert einiges rechtēs.

Er mit eignem tyrāniſchē

gewalt/vō dem Ro-

maniſtē/an leib/

eer/vnd güit/

beſchwert

vñ benō-

tiget

wer

de

••

Ein groſſes dingk iſt die warheit/vnd  
ſtarck über alle. iij. Eſdrē. iij.



L 2, 2673.

Faint, illegible text, possibly bleed-through from the reverse side of the page.

Faint, illegible text on the left side of the page.



8523 58





Allen vnd yeden teütscher Nation/für  
sten/herren. Edelleuten: Burgern/vñ  
gemeinen/was stands oder wesens die  
seint/Embeüt ich Ulrich von Hutten  
Poet vnd Orator: meine vnderthenige  
schuldige willig vñnd früntlich dienst  
zuuor. ¶ Gnädigen günstigen lieben Herren vnd  
freünd/Als ich verschiner zeyt/auß lieb vnd züneig-  
ung der Christeliche warheit/auch wolmeinung vn-  
sers vatterlands teütscher Nation/etliche ding/die  
zu verhaltē weder Christlich/noch meiner gepür ge-  
acht schriftlich angezeigt/vñ durch den truck außge-  
gossen hate/Vämlich von dem übermässigen vnzim-  
liche/des Papssts gewalt/von dē verkertē stand der  
Statt Rom/vō wollüstigem vnordeliche überfluß/  
vnd vnersätliche geitz der geistliche/von der Simo-  
neische Ketzerey/vñ vnfromkeit der Curtisanen in ge-  
mein von denen/die wiewol Geistlich genennet sein  
wollen/doch gar nit dem geist/sonder fleischlichem  
wesen nach leben/vñnd mit aller begir nach wollust  
des leibs trachtē/auch von Cōstitution vnd gesätzē  
der Papsst/die sie ye mer vñ mer fürnemē/Von dē ty-  
rannischen gewalt der Bullen/so täglich hie vmher  
regiert/vnd dergleichen ander dingē/durch welche  
die Cristenliche warheit/vilfaltiglichen/vnd gleich  
vnauffhörlich abgezogē/teütsch lād außs schedlichst  
vñ schmeelichst beschwert vñ vndertruckt wirt/vnd  
die ding so klärlich vor augē waren/das sie niemant  
widersprechē/so gar vnbillich/dz sie keines wegs ent-  
schuldiget/noch vertedingt werdē möchtē/auch als  
ich die durch geschriff offenbaret/nit allein mich key-  
ner übelthat schuldig wüste/darumb ich straff zu ge-  
wartē hette/sond auch der massen verdienet erkante

Dardurch ich billich belonung zu vorhoffen gehapt als  
der vormanig gab sollycher dyng / die Cristenlycher  
ler gemess / mir nit minder gepürlich / dan dem glaubē  
beystendig / vnd gemeyne nutz nottürffig / dan ye dz  
meyn vornemē gewest / wie ich durch gürtige erman-  
ung / vorschaffen möcht / do mit die selbigen geystliche  
doch zum lesten / sich zu besserung erinerten / vff dz sye  
gemeinem Cristlichem volck / zu irer vorvolgung nit  
zu vyel vrsach gaben / vnd ich aber auß erbarem ge-  
müt / lauterem gewissen / Cristenlichem glauben vnd  
gütter hoffnung dises angefangen / hab ich als bald  
eyn sollich bewegung etzlicher menschen wider mich  
befunden / als hette ich mich neüwerung / oder vmb-  
kerung eynes gemeynen Standß vnterfangen dan  
man mir mit emßigtlicher gräschaft grausamliche  
trauwen / mit ser hefftigem schrecken / vnd gegenwü-  
tiger farbe begegnet ist / als solt man mych mit bapst-  
lichem bann verthammen / oder in gefengniß legen /  
oder aber öffentlichen vmb bringen. Ich byn Auch  
gewarnet / der keines zu fürchtē / sonder man gedencē  
mich heimlich mit woffen oder gifft zu ermordē. Vnd  
ist gemeinlich aller achtung gewesen / Ich werde / es  
geschehe gleych in welcher gestalt es wöll abgetilget /  
vnd von leüten gethan / Es haben auch etliche sych  
hören lassen / Sy wissen mer dan sye offenbare gedörf-  
fen. So bin ich von Rom außher vorstendiget vnd  
bericht / durch wes stiftung vnd emßiges anhalten /  
solliche radtschläge vber mich geschehen . Vnd als  
Ich nach dem in Brabant gezogen / do selbst etliche  
tag am hofe des großmächtigste vnßers aller gnäd-  
digsten herren König Carolus / meyer geschäfte hal-  
ben vorharrete / Ist mir von güttten fründen / vnd be-  
kanten / so ich des ortes hab / hefftige warnung gesche

hen/ mich bald/ wöllich meyn leben behalten/ vō dan  
nen zū machen. Dan zū vorderst ann dem ort werde  
mir vff das geschwindest nach getrachtet/ also dz ich  
nit anderß/ dann mit eylender flucht entgehen möge.  
¶ Als mir das vorkommen/ hab ich erstlich/ in betras  
chtung vnd ansehen meynen vnschuldt/ die sachen ley  
cht geacht. Als mir aber bald darnach solche ding nit  
einer oder zwen/ sonder mer vñnd vil zū erkennen ge  
ben/ hab ich mich bedacht/ die sach nit lenger zū ver  
achten/ vnd eylentes vnd dannen verückt ¶ Ich sag  
nit/ wer myr der massen noch gestalt oder getracht  
hab/ oder dz es in der warheyt also geschehen. SOND  
sag ich/ gutte fründt haben mich gewarnet/ mir wer  
de nach meynem leben getracht/ vnd iezū sey ich nit  
weyt von meinem end. Do ich nun als der vnwissend  
fleyssiglich gefragt/ von wem ich oben angezeygete  
farbe zū gewartē/ ist mir gesagt/ ich hab mich vor de  
nen/ so des bapstes geschäften hie aussen pflegen/ vnd  
einem yeden Curtisanen/ er sey wer er wölle zū hüten  
¶ Das aber gedachte warnung/ nit on grüntlich  
wissen der sachen geschehē/ hat sich bald darnach be  
wisen. Dann als ich den Rhein wider auff gezogen/  
seynd mir etliche von Rom kommend begegnet/ dye  
offentlich gesagt/ es sey zū Rom bey allen dz geschrey  
Leo der Bapst sey vnuerfürlich vber mich erzömet/  
hab auch bestalt / mich vff das aller härtest vñnd ges  
chwindest zū veruolgen. Vnd do ich gen mentz kom  
men haben mich gutte freünd vñ günder mit frolock  
en entpfangē/ sich meynen zükünfft vast gefreüdt vñ  
etliche sich nit wenig/ das ich noch lebte vorwundert.  
Dann sy angezeyget/ ist auch das gemeyne gerücht  
gewest/ man stelle mir der massen nach/ das ich dem  
bad nit wol entgeen, werde. Der halben sy auch eyn

zeitlang an meinem leben verzagt gewest / fürchtēd  
es wer schon vmb mich geschē. On not ist vff dis  
mol zū vorzelen / was ich doselbst weyter erfahren /  
Do ich wider gen Franckfurt kommen / seind mir  
briefe vnd bote von gütē fründē zūgeschickt / auch  
etliche selbs zū mir gereiset / angezeigt / wie yetzo der  
Bapst mit briefen vnd botschafftē / von etlichē teüt  
schen fürsten fordere / etlichen auch zū denen er irer  
pflicht nach / fuge hab / gebotten / mich im gefangē  
gen Rom zū überantworten / vnd zū voran / hab er  
sollichs mit einem von den grōsten / den er meinte /  
sol das am bāsten zū thun habē / ganz ernstlich ver  
schafft / mit angehenckter trawung / wo das nit vō  
im geschāch / in fürter mer / nit vor einen freünd zū  
halte / sond seine huld vō im zū wendē. So bald nū  
solliche mer außgebrochen / ist ein grosser schrecken  
in die / so mir vor mit gunst vñ lieb verwandt / gefal  
len / vnd haben sich etliche vō den kleinnütigē vnd  
erschrockenen / als bald mein entschlagē vnd geeüf  
fert. Es ist aber yetzo gemelts gerücht noch kaum  
erkant gewest / hat man mir noch weiter auß nider  
landt / zū wissen gethon / Wie einer des Bapsts ge  
schickten / yetzo bey Rōmischer K. M. auß beuelch  
mich allenthalbē im reich anzūgreiffen / gewalt zū  
bekōmen / sich grosses fleiß bearbeyte / vnd also bra  
chium seculare / das ist den weltlichē gewalt / nach  
zū eruolgen. Disen vnd dergleichen erschrocklichen  
vermanungen vnd geschichten nach / seitmal ich of  
fenlich sieh / was ich vorhien nit glaubt hette / von  
in gedacht werden solle / yetzo nū zū der that kom  
men / vnd wiewol ich bissher der massen gehandelt /  
das mein fürnemē zū gemeinem nutz / wolfart des  
vatterlands / auch zū aller erberkeit / rechtem glau

ben vñ der warē geistlicheit / nit wenig gedienet ha-  
ben möchte / darumb das auch nit allein niemands  
gezym zū scheltē / sonder von nöte / durch yderman / so  
der warheit pflegē wöllē / bezeugt vnd gelobt werde  
müsse. Vnd ich doch vñ grösse willē die farhe / so mit  
gewalt vñ heimlich wider mich gericht (dan ich mich  
offentlich / vñ durch recht noch ietzo nit zū fürchtē hab  
oder weis) nün hinfür in fürstlichē höfē / nit stat hab  
noch meinen herrē vnd freündē dienen / vnd (die sum  
darvon zū redē) das ich mich (aus scheinūg der Cur-  
tisanē / derē an allē orten vil seind / die auch gifft vnd  
eisen habē / vnd on zweifel in alle weg dē bapst dienen  
werdē) alles offentlichē gebrauches entschlagē müß /  
vnd das selbig doch nit auß verschuldung einiges ir-  
tums / ich geschweig der missethat sond auß gewalt  
dero / die in irē mißlebē nit leidē mögen / die warheyt  
vō jnen außgegebē werdē / so wil ich der selbigē leüte  
gewalt vñ macht entwychē / auß den höfen / auß ge-  
meinē versamlungē / auß den stetten / vñ offentlichē  
wandelen. Aber der massen will ich wychen / das ich  
doch mitler zeyt nit vō bezeügūg der warheit (zū wel-  
cher alle ding gezogē werdē sollen) noch auch von be-  
schirmūg freiheit des vaterlands (des halbe ich auch  
den tod nit fürchten sol) jmer abtrete. Das ich dann  
zū tū vorlangē mit allē vermögē vnderstandē / hab  
es aber mit früntlichen vermanungē dohien nit brin-  
gē mögen / dz die ding / so götlicher warheit vnd frey-  
heit des vatterlāds entgegē sein / sich in der gütlicheit  
vnd fridlich wöltē anderē / sond werde zūletst dohien  
genötiget / das ich nit allein / nach leutē müß denckē /  
die mir die warheit hanthabē / vñ freyheit des vater-  
lāds vorfechtē helfen / sond auch anrüssen / die mich  
bey meinē leib vnd leben behalten. Hierumb der ich  
vor mit gantzem fleiß betrachtēt habe / wie ich leüt

bewegte/dye der Cristenlichen warheyt (die vnter so vil vo ruckern not leydt) zu hilff kâmen/vnd der selbigenn die missarbe/do mit sie lange zeyt hâr nit on merckliche schmach vnnnd nachteyl vnser s glaubens verplendt gewest/abwûscheten/vnd das joch so erwâ von Christo vnserm herren sanfft vnd leydlich auffgelegt/ietzo von den angezeygten gottes widerwertigen/mit grosser bitterkeyt beschwerlich vnd vntâglich gemacht ist/abwûrfen/vn ausschligē/den schndden vnd schandlichen bezwangē/ do mit teutsche Nation vil jar hâr durch die Bâpste betrangt vnd vntertrickt gewest hinlegten/vnd widerbrâchten die freyhayt/welhe got selbs den seinen ganz milticklich dar gegeben/aber gedachte bâpst/ganz vnfreuntlich vn freuelich benomen/vngestûmlich zerbrochē/vnd nahet ganz auß getilget haben/der selbig ich/vmbgebē mit nachtrachtungen/ge trieben durch veruolgun g/ werde gezwûngen/vff dz ich beym leben bleybe/vnd sollicher ding lenger pflegen mûge/ Jdermâ vn hilff rat/vnnnd beystand an zu schreyen. Wo fliehe ich aber hin? Oder was hilff bitte ich? Gnâdigen herren vnnnd gûtten freûndt gemeine teutsche Nation/euch sûch ich ann. Lûch bitte ich/Wolt ir lassen auß treybē die wol verdieneten? Wolt ir lassen die vnschûltigen mit gewalt peynigen. Das sey weyt von euch. Nit lasset von euch sagen/das ir gegen eynem heymischen vnd landß verwanten nit gûttig vnd barmhertzig gefunden/so doch alweg die teutschen/ gegen frembden vn auß lenden/sich frey vnd milt erzeygt haben? Seyt auch dar vor/das nit wo ir mich verlyessent/ Jch bezwûngen wôrde außlendische hilff zu sûchen/vn frembden beystand an zu rûffen. Jch werd mit keinem rechten angefochten/sonder durch gewalt/vnnnd manige

meyner wider wertigen vberfallen. Ich werd nit  
rechtlich oder billicher weiß ersucht sonder mit mit  
willigem grimm meynes feinde betragt. Wo ist  
redlicheyt vñ tugent der teütschē? Wo ist ire sterck  
vñd manheit/dar von alle Nation alle völker sin  
gen vñ sagen? Ir werden teutschen/beschirmet als  
le eyner/dan eyner hat vor vch alle gearbeytet. dā  
ietzo wār ich inn des Römischen bischoffs genaden  
vñd gunst / hette ich nit wöllen vnßerm vatterland  
zū güte/an gemeinen nütz wenden/alles das ich mit  
so grosser arbeyt/ In meynem harten vñd schwärē  
wandern/durch so viel bittere gegenfell / vñd wid  
wertikeyt des glückes gesucht / vñd erworben hab/  
dar vñ ich so vil nacht gewacht / so vil täglicher vñ  
nächlicher reys weyt vñ breit gethan / so vil mühe  
gehapt / so vil not erlitten / eyn schmällich vñd verz  
ächtlich armüt getragen / viel Jare im Elend vñb  
gezogen / vñd das selbig alles in der besten zeyt / vñd  
meynen blüenden Jaren. Mich haben aber hulde  
der warheyt / vñ lieb meines vatterlands zū inen ge  
zogen. Desto mer solt ir mich gethaner dienste ge  
nießen lassen. Vñd bite / ir wöllet mich frucht meyn  
er arbeyt enpfahē lassen / alleyn darüb / vñ das ir  
gesehen werd meyn fleys vñd dienst erkandt habenn  
So ist ie erbärmlich zū hören / dz ich / wie wol mich  
noch nymants beklagt / nymants vberzeüget hat /  
vor keinen richter gefordert bin / vñd mir nye keine  
missetat auff gelegt ist / allein zū peinlicher straff ge  
zogen / vñd vñerfordert einiges rechtens zū dem tot  
geheyschen werde vñd wil euch nymmer fügen / mich  
vñuörhört / on antwort / vñd sonder vrteyl ertöten  
lassen / ich geschweyg / das / wie wol doch in teütschē  
landen gericht vñ recht ist / die vbeltat ob die ich od

ein ander betribē hete / zū straffen / vñ ich kein recht  
nie geflogen bin / über das alles / zū spott vñ verach-  
tung diser Nation / bey einer frembdē oberkeit hien  
gericht werdē solt. Hierumb noch / wie allwegē vor  
mein beger vñnd bitt an eüch / Wo yemant meines  
schreibēs oder thuns beschwerde trüg / vñ mich des-  
halben klagēs nit erlassen möchte / ir wolt verschaf-  
fen mich von dem selbigē vor meinem natürlichē / ei-  
nigen vñd vnser aller herren R. R. M<sup>t</sup>. vorgenom-  
men / vñ nit also mit gewalt vñd on recht verkürzt  
werdē / zūvor an vñm des willē / das nit meine feind /  
ob sie mich / do gott vor sey / irem willē vñd fürnemē  
nach / vmbbrächten / übelthat od laster nach meynē  
tod vff mich ertichtē. Vñd ob ir meinēhalbē nicht  
thün oder lassen / so wölt doch meines geschlechtes /  
oder freütschafft hirinn verschonē / das nit den sel-  
bigen dise mackel vñ besleckung werde angehangē.  
Das bittē euch zūgleich mit mir: vnderthäniglich  
fliehēd mein armē alten Vatter vñd Mütter / mei-  
ne iungen betribten Brüder / alles mein geschlecht  
vñd früntschafft / ein grosse schar der ihenē / die mir  
eerē vñd güts gūnnē / vil geleter leüt / vil edler Rit-  
ter vñd knecht. So ermane ich euch weiter / hab ich  
ye durch meine schrift / gemeiner teütschē Nation  
lob geschafft / ir wölt euch doch auch mein gerücht  
beuolhē lassen sein. Hab ich ye vnser vatterlands  
preiß gewürcket / ir wöllent eüch doch über mein an-  
fechtē erbarmē. Hab ich ye eüwere eer geweitert /  
so wöllēt doch yetz mein heil nit verlassen. Solt ich  
von euch abgetrennet vñd gerissen werdē! vñ diser  
erden / die mich in meiner gebürt empfangen / Auß  
dem lufft / der mich erneret / von disen leüten / deren  
ich so gar freüntlich gewonet hab! mein vätterlich

wonung verlassen. die heimische herdstatt vnd al:  
tar/vnnd nit der gestalt/das ich ins ellend gehe/do  
selbst armseliglich zu leben/sonder zu einer grau:  
samen marter/schantlich aldo zu sterbē/ abgenom  
men vñ verruckt werde/ Helfft alle frommen teüt:  
schen. Erhaltet den betrangtē vnd genötigtē/ vnd  
laßt nit binden mich/der die Bapstliche bande hab  
von euch ziehen wollen. Ob schon meiner feindē vn  
zimlicher gewalt/von etwo vil jaren her in einen  
grossen mißbrauch ist kommen/das lasset mir doch  
nit an meinē lebē schadē. Ich ermane euch meines  
dienstes. & vileicht eines lones wert/meiner woltat  
vñ die ich widgeltüg zuuerhoffen. entschützt mich  
(& wo sträflich erkāt wär/billich vnd euch solt ge  
strafft werdē) gegē ein vßlendigē macht/als lands  
leüt als die vmb deren willē ich etwas gethon hab/  
wider einen vngbürlichen/vnformlichen/miütwil  
len vnnd gewaltsam. Dann mir ye billicher solt  
gebüren/hilff vnd rettung vmb eüch zu erwerben/  
dann meinen widerwertigē mich zu ertöten gezimē  
Wie billich mag dann geacht werdē/das/wie wol  
ich nie keines lasters/keiner schand oder übelthat  
geschuldiget/vñ ich kein vneer oder laster (on rüm  
zu reden) von mir weiß/dānoch mir (als ich gewar  
net) mit gifft nach gestalt/mit waffen vnd geweer  
zügesetzt wirt. vnd forderē mich gen Rom/vff das  
deren hertzē mit gramschafft gegen mir erhitziget/  
irē augē einē lust schaffē mögē. Ist yemant also vn  
barmhertzig/also mit demāt verhertet/dz in dises  
mein trübsal nit zu weinē bewegt/ O allmechtiger  
gott/& alle ding sichst/wölst deine rechtuertigē aus  
gen/über disen iamer wendē. Vnd ir teütschē wolt  
mich/ewern lādsmā/vñ dē vnschuldigē vorfechten

B ij

alle vmb eins willē Kriegēde / seitmol auch dise sach  
nich all in gemein antrifft. Dan ist nit in güte schein  
was nachurteil auß meiner verdäung volgē mögē  
hierum verhütet / dz dises beispil nit weiter bey vch  
inwurzele. Ir habt ab meiner verderbüg sarhe zü  
gewarten / vñ auß meinem tod volget ewer gefenck  
niß. Thüt auff eüwere augen / vnd erkēnet / wo ir  
seyt / vnd wohien ir geführt werden. Wan schuldige  
mich nit / das ich übel gelebt / sunder dencket mich /  
vmb das ich wolgemeinet / zü straffen. ich werd nit  
als hette ich einen menschen geletzet vorgekommē /  
sond vñ dz ich vil verletzten zühilff kommen / an die  
marter vnd den tod gezogen. Niemand clagt über  
Hutten / das er jemāt mit gewalt begegnet sey / son  
der kumpt im zü schadenn / das er der vergwaltig  
sten warheit zühilff kommen. so darff man mir nit  
die schuld geben / das ich ein nüwes feur hab anzin  
den wollen / sunder ist war / vñ mag mir für ein wol  
that gerechnet werdē / das ich den weit vñ sich brē  
nenden flammen des Leonischē geytzes / der sich ye  
lenger ye mer yetzt zü gemeiner verderbüg außbrei  
tet / hab zü lesehe vnderstandē. Mir wirt kein miß  
handlung zügemessen / sond muß der erberkeit ent  
geltē. Kein frummer ist mir abgünstig / sonder haf  
sen mich die bösen. Straw / glaub / vñ redlicheit als  
ler Teütschen / verhengēt nit das mit gewalt über  
wunden / die mit recht nit haben wollen fechtē. Las  
sent mich die nit vndertrucken / denē ich / vff das sie  
euch alle nit vndertruckten / mich entgegen gesetzt /  
vnd in färlicheit ergebē hab. Vnd das ich euch wey  
ter nichts ermane / so lasset mich doch / das vor key  
nem nie versagt / vmb euch erwerbenn / das ich / ob  
mich yemant besag / zü verhör vñ antwort kommē

möge. Es ist ein alte gewöheit/vnd tieff in der teüt-  
schen gebrauch erwachsen/vnbeschuldigte/vnuer-  
antwort/vnd on vrtail/Keinen menschen auch von  
den minsten zü döten/oder auch vff andere weiß zü  
straffen/einem yeden wirt gericht gessen/vnd vr-  
teil erkennt. Nit wegeret mir/das man einem sews-  
hirten vergunt/das allen armē knechten widerfa-  
ren mag. On zweifel/mag ich vor einem gebürliche-  
richter zü antwort kommen /ich werd überwindē.  
Solich aber mit gewalt vnd macht kriegen/so bin  
ich vil besser nit/dañ ir mich habē wolt/wiewol ich  
der (wo eüwer hilff gewiß) on forcht bin/werd dan-  
nocht nit/ob ich schon von euch verlassen/in farhe  
gesetzt/auß vertruwen meines gewissens/vorzag-  
en/dañ ich hoffe zü gott/vnd er wirt mich erlösen.  
vff das nit als ein grimmiger leo mein seel verzucke  
wo nit yemāt sein würde der mich rettet. Mich has-  
ben vmbgeben vil hunde/vnd der radt bößwilliger  
leüt/hat mich belegert. Sie warten vff meine seel/  
als ein leo bereit zü dem raub. Aber got wirt abwē-  
den alles übel zü meinen feinden/vnd in seiner götli-  
chen warheit/wirt er sie zerstreuen. Dann er wirt  
mich erlösen auß den stricken der iagenden Curtisa-  
nen/vnd von dem scharffen wort/des bapstes Leo-  
nis. Der selbig wiet yetzo über mich/vnd durch brē-  
nende anreizung seiner begir/wirt er vngestüm-  
miglich gegen mir gehezt vnd getribē. Ist aber so  
weyt vō hin / das ich villeicht seiner halbē in sicher-  
heit wär. Hierumb mir diser zeit allein von dē Cur-  
tisanē/vnd andern des Bapstes anhenger/im teüt-  
schen land/farhe züstet. die selbigē (als ich güt wiss-  
sen hab) nit nach lassen/sonder auß schmerzen irer  
durch mich angefochtē vñ verhindten practickē/sü

chē sie weg / mich zu verfolgē. Wiewol nun on zweif  
fel irem bösen lebē each / gott selbs über sie erzörnet  
ist / so wil doch auch gebüren / sie meinēthalben an  
red vnd rach nit zu erlassen. Dann durch die hende  
der seinen strafft gott die übelthäter. Vormalz has  
ben sie teutsch Natio erbermlich vmbgetribē. yetzo  
dencken sie / alle die ire heimlicheit offenbaret habē /  
zu verderben. Wolten das die teutschē leiden: Solt  
nit irem so hochfertigē mütwillen entgegē gedacht  
werden: Vnd das ir recht verstandt habē wer mich  
verfolge / vnd mir nachstelle: das seind die vsacher  
stifter vnd handler aller der ding / die / wo von mir  
in meinen büchern vnd geschrifften nit gestrafft vñ  
gescholten weren / möcht ich sonder anfechten vnd  
entgelt nüs bleiben / hete ich sie aber gelobt / wer ich  
selig gemacht. Dise kere allen fleiß an / geben hilf  
radt / fürschrub vñd fürdernüs dar zu / das teutsch  
landt ye mer vnd mer / von den Romanisten berau  
bet vnd geschundē werde. Ich meine die vntrewen  
Curtisanen / die verfluchtē Symoneischen ketter /  
die ein verhafte / schandliche / lästerige practick in  
gebrauch habē bracht / darauß gott geschmäch vñ  
verspottet / die warheit verblindt / teutsch Nacion  
nit allein durch abnemung vñ beraubung ires gel  
des vñ zeitlicher güter beschädigt / sond auch durch  
böß exempel vnd beispil / so sie vñ Rom herauß brin  
gen / an gemeinen sittē verfert vnd geergert wirt.  
Dan seitmal sie als diener / außrichter / vnd schaff  
ner des Papsts im zu dē vnbillichen überschwenck  
lichen gewalt / dar zu er an ir fürschrub nie kommen  
war / verholffen / habē sie allē bösen hendlē vnd wer  
sen vsach geben. Durch diser fleiß regiert der aber  
glaub / vñ bleibt die wore gottes eer außgeschlossen

Durch diese seind die bapst dohien behertziget worden  
das sie die warhafftig euangelischen geschriffte / des  
mertheils vertruckt / vñ etliche gesetz allein zu ire ge  
win vnd eigē nutz beschriben haben. Dise ätzen den  
Römischē gelt schlundt / vnd speisen den vnersättli  
chen geitz worm / der hie vnserē väterlichē güter ver  
schlindt / vnd vō dorthē widerum von im speyet zer  
störung güter sittē. Dise habē es dohin bracht / das  
vns die Bapst einē strick angelegt / den wir (sie wer  
den dan außgereütet) nimer auffknüpfen mögen /  
Dises seind die bösen anreitzer / zu schaden des vat  
terlāds geborē. Dis seind des Römischē tisches weid  
leüt / die für vñ für der selbigē fresserey zu jagē. Vñ  
nit mind tagē sie zuuul / dan auch Rom solcher ding  
vnersättlich ist. Hierumb thünd auff ewere augē ir  
teutschē / vnd secht wer euch hie beraub / vñ in frem  
den landē zu nachred bringe von wem ir am mein  
sten schadē / nachtheil / vnd ewers stadts ergernüß  
habt. Tempt war der schalckhaftigē aplastremer  
der schedlichē kauffleüt / die euch gratiē / dispēsatiō  
absolution / vnd allerley bullē zum marckt bringē /  
Die treibē kauffmanschatz / mit geistlichen vñ heili  
gē dingē / in der kirchē gottes / darauß er etwā trib  
vnd schlug / die doch nür schnöde vnd weltliche war  
kauffte vnd verkauffte. Dis seind die kunstreichen  
werckmeister aller böser fünd / die listigē vñ geschei  
den stifter alles betrugs / von denen herkumpt ver  
ruckung vñ gefencknüß dises lands. Solche habē  
mich in verhinderüß bracht / vnruwig / vnd leidig  
gemacht / in farhe vnd not gesetzt / vmb keiner ande  
ren vsach willē / dan das ich ire kunst außgebē / ire  
schand enblösset / irer raubery zu gegē gewest: irer  
vnarmhertzigē schinderey verhinderüß gethon.

B. iij

Vñ vñlleicht durch mich nit wenig irem gewin entzoge / dem rechtē warē Chriſtē glaubē etwas zūgāgen. Allweg hab ich vffrūr vermittē / vñ nit wöllē des gemeinen volcks entbörung vrsach geben / vñ das ir mercket / das mein meinung nie gewest / vñ bterung des geistlichē standis zū erweckē / so hab ich bissher / was des selbigen mislebē vñ vñgeber antrifft / in latin geschribē / als in heimlich ire gebrechē anzeigen. Dāñ wiewol ich das zūthūn gūte sūg: vñ mer dāñ gnūgsame vrsach gehabt / so wolt ich doch dise ding dem gemeinē hauffen noch nit offenbarē. Dieweil ich aber yetzo sieh / das sie durch keine gūtige vermanung sich beteren wöllē / sonder gegē brūderlicher getrūwer vermanung / mōrdery vñ auftilgūg wendē / so will ich dannoch auch also / nichtz ārgers gegē jnen sūnemen / sond wie ich auch yetz von jn / vñb das sie mir gewalt vñ vñrecht thūn clagē / ewer gnadē vñ gunst hilff bewerbē / vñ beistand anrūffen / nit das ir sie verderbet / sonder das ich durch eūch vor jnen mög enthaltē werdē. Dāñ wiewol sie mir so manigfeltig / vñ oft vrsach gegeben / will ich doch auch noch nit / das sie vñ ire missehat gestrafft werden / sonder des jnen geweret / sollichis hienfür gegen mir oder jemants sūzunemen radten vñ weißē. welchs der billicheit zū achtē / das ob ich schon nit vñb eūch begerte / solt es die sache auß ir selbs von eūch erlangē. Vñd zweifel nit / das wo ir die selbig also zūherzen nemmet / als sie eūch scheinbarlich vor augen ist / mir hernach eūch vñ hilff anzū sūchen / nicht von nōten sein werden. Des ich mich auch auff diß mal meiner yetzgehapten bitte vñd begierde / vñd der sachen billicheit nach / zū eūweren treūwen genaden vñd gūnsten

als vnabwendlichen anhangern der Euāgelischē  
warheyt / liebhaber götlicher gerechtikeit / beschir-  
mer des vaterlands gemeiner freiheit / vnd vorvolg-  
ger alles vnrechts / schanden / vnd laster / versich vn  
getröste. Vnd will das also vō eüch besche  
hē / alzeit vnterthänigklich vn

freintlich / mit allem mey-  
nem vormögē wider  
zu verthienen / willig  
vn geflissen seyn.

Geben vnter  
meynem an  
gebornen

In sigel vff Sanct Michaels des ertz engels obent  
Im jor nach Crist gebürt M ccccc vn xx

*[Faint, illegible text, likely bleed-through from the reverse side of the page]*



Etimal ich auch verstandē hab/wie  
das etliche mir zū nachteil/meine bü  
cher vnd geschriſt/bey den vnuerstēs  
digen übel außlegē. vnd anders/dañ  
die an in selbs verstanden werdē mö  
gen/verteütschē/domit ich mich dañ  
bey yederman alles verdachts erledige/vñ auch ge  
meinem mañ/wie billich oder vnbillich ich gehanz  
delt/vnd ob ich dem Papst oder seinen Romanistē  
ye vsach geben hab/mich obēangezeigter weiß zū  
veruolgen/erkentlich sey/so habe ich mir fürgenōs  
men/Alle meine Bücher/die ich bißher in latin ges  
schriben/vnd drucken hab lassen/darinnē dañ (als  
ich nün erst sieh) dem Papst seines gefallēs nit von  
mir gelebt/in teutsche sprach/so best ich jmer mag/  
vnd sich das schicken will/zū transferierē vnd auß  
legen. Dann ich gantz kein abschew trage / sonder  
beger von hertzen das yderman wissen hab/welch  
es die braut sey/darumb man mir tanzē zūgemüt.  
So zweifel ich nit/wo die selbige meine gschrift ins  
teütsch kommē (als dañ ob gott will/bald geschehē  
sol) man werd erfinden/das ich anders nit/dañ er  
barlich/eerlich/vnd als ein frummē vom Adel nit  
vngüblich geschriben. Das hab ich meiner  
notdurfft nach zūvor anzeigen vnd ver  
kündē wöllen. Ulrich vō Hut  
ten/qui supra.










68 2656 a

X 220 3200

~~COPIED~~  
395







# Ein Clagſchrift des Hochberühm-

ten vnd Vernueſtē Herrn Ulrichs vō Hutten  
gekrōneten Poeten vñ Orator an alle ſtend

Deütſcher nation/Wie vnformlicher  
weiſe vñ gātz geſchwind/vnerſücht  
oder erfordert einiges rechtēs.

Er mit eignem tyrāniſchē

gewalt/vō dem Ro-

maniſtē/anleib/

eer/vnd güt/

beſchwert

vñ benō-

tiget

wer

de

..

Ein groſſes dingk iſt die warheit/vnd  
ſtarck über alle. iij. Es dr̄. iij.



L 2, 2673.